

四庫全書

子部

欽定四庫全書

子部

太平御覽卷七十三至七

詳校官侍讀學士臣沈咸熙

負外郎臣牛稔文覆勘

總校官降調編修臣倉聖脈

校對官中書臣袁文邵

謄錄監生臣沈浩

欽定四庫全書

太平御覽卷七十三

宋 李昉等 撰

地部三十八

橋

堰埭

橋

說文曰橋水梁也音角水上橫木所以渡也亦曰灼

音灼

今之略約東楚謂橋為圯

詩曰維鷦

音題

在梁不濡其翼

又曰造舟為梁

又曰有狐綏綏在彼淇梁

爾雅曰隄謂之梁郭璞注梁即橋也或曰梁石橋也石

杠

音江

謂之倚

音奇

亦曰石橋也

史記曰張良嘗間從容步遊下邳圯上

楚人謂橋為圯音怡

有

老父衣褐至良所直墮其履圯下顧謂良曰孺子下取

良下為取履因長跪履之父足受笑而去

又曰文帝出行中渭橋有一人從橋走乘輿馬驚使騎捕之屬廷尉張釋之治問曰縣人來

如淳曰長安縣人

聞蹕匿

橋下久以為行過既出見車騎即走耳廷奏犯罪蹕當罰

金

又曰西門豹發民鑿十二渠引河水灌民田到漢之立而長吏以為十二渠橋絕馳道相比近不可欲合渠水且至馳道合三渠為一橋鄴人父老不肯聽長吏以為西門君所為也賢君之法式不可更也長吏終聽置之

漢書曰薛廣德為諫議大夫上酎祭宗廟出便門欲御樓船廣德當乘輿免冠頓首曰宜從橋詔曰大夫冠廣德曰陛下不聽臣臣自刎以血污車輪陛下不得入廟矣上不悅光祿大夫張猛進曰乘船危就橋安上曰曉人不當如是耶乃從橋

東觀漢記曰班超討焉耆王廣遣其左將比鞮友奉迎超賜而遣焉耆見有鞶橋之險廣乃絕橋不欲令漢軍入見超更從他道渡

魏略曰驢分國往大秦渡海飛橋長二百三十里

又曰洛陽城西橋洛水浮橋三處三柱三公象也

魏志曰鍾繇嘗與族叔瑜至洛陽道遇相者曰此童有貴相然當厄水行未十里渡橋馬驚墮水幾死而後至太傅

又曰景元四年伐蜀鍾會領十餘萬衆分從斜谷入先遣牙將許儀在前治道會在後行而橋穿馬足陷於是斬儀

蜀志曰先主為曹公所追張飛拒後據水斷橋無敢近者

吳志曰凌統字公績從征合肥為右部都督時權徹軍還前部已發魏將張遼等掩至津北權使追還前兵兵已遠勢不相及也統率親近三百人扶扞權出敵已毀橋之兩板策權馬過統復還戰

王隱晉書曰杜預啓建河橋于富平津衆論以為殷周所都經聖賢而不作者必不可作故也預曰昔造舟為

梁則河橋之謂也遂作橋成上從百官臨會舉杯謂預
曰非君此橋不立也預曰非陛下之明臣亦不獲奉成
聖制也衆咸稱善

後魏書曰崔亮為雍州刺史城北渭水淺不通船行人
艱阻會天大雨山水暴至浮出長木數百根藉此為用
橋遂成立百姓利之至今猶名崔公橋

又曰于栗磾音低從太宗南臨孟津謂栗磾曰可作橋乎

磾曰杜預造橋遺事可想乃編次大船構橋於野坂六

軍既濟太宗乃深嘆焉

北齊書曰張亮守河州文帝於上流放火船欲燒河橋
亮乃備小艇百餘皆載長鑠鑠頭施釘火船將至即馳
小艇以釘釘之引鑠向岸火船不得及橋全亮之計也
唐書曰韋景駿神龍中累轉肥鄉令縣北界漳水連年
泛溢舊岸迫近水漕雖脩築不息而漂流相繼景駿審
其地勢拓南岸因高築堤暴水至堤南以無患水去而
堤北稱腴田漳水舊有架柱長橋每年脩葺駿又改造

為橋自是無復水患至今賴焉

戰國策曰豫讓欲為智伯報仇漆身吞炭襄子當出伏於橋下至橋馬驚曰是必豫讓也求之果是

述征記曰方輿縣鬼橋忽一夜聞人呼喚聲車行雷駭曉而石橋自成家家牛皆喘息未定

齊地記曰秦始皇作石橋欲渡海觀日出處舊說始皇以術召石石自行至今皆東首隱軫似鞭撻瘢形似馳逐

英雄記曰公孫瓚擊青州黃巾賊大破之還屯廣宗袁
本初自往征合戰於界橋南二十里紹將鞠義破瓚於
界橋斬瓚冀州刺史綱嚴又破瓚殿兵於橋上即此梁
也

潯陽記曰廬山有三石梁長數十丈廣不盈尺窈然無
底吳猛將弟子登山過此梁見一翁坐桂樹下以玉杯
承甘露漿與猛又至一處見數人為猛設玉膏猛弟子
竊一寶欲以來示世人梁即化如指猛使還寶其梁復

如故

三輔故事曰漢丞相夏侯嬰墓在飲馬橋東大道南人謂之馬冢

三輔黃圖曰秦始皇併天下都咸陽營殿端門四達以則紫宮渭水貫都以象天漢橫橋南渡以法牽牛

襄陽耆舊記曰木蘭橋今之豬蘭橋是也劉季和於此橋東大養豬襄陽太守曰此豬屎臭當易名豬蘭橋初如戲言而百姓遂易其名

郡國志曰漳水建武十一年造紫陌浮橋於水上有天井堰魏文侯時西門豹為鄴令沉巫處也

又曰通門內有臯橋即漢臯伯通居此橋以得名梁鴻賃舂之所

應璩華陽國志曰李冰造七橋上應七星故光武謂吳漢曰安軍宜在七星橋間也

又曰昇仙橋在成都縣北十里即司馬相如題橋柱曰不乘駟馬高車不復過此橋

又曰萬里橋在成都縣南八十里蜀使費禕使吳諸葛亮送之於此嘆曰萬里之路始於此橋因名萬里橋地理志曰漳水出上黨鄴中趙武帝於漳水造浮橋接紫陌故號曰紫陌橋

祖台之志怪曰義興郡溪渚長橋下有蒼蛟吞噉人周處執劍橋側伺久之遇出於是懸自橋上投下蛟背而刺焉蛟數創流血丹溪自郡渚至太湖句浦乃死

水經注曰上虞縣亦名虞賓舜避丹朱於此故以名縣

百官從之故縣北有百官橋亦云禹與諸侯會事訖因相虞樂故曰上虞二說不同未詳孰是

國語曰天根見而水涸水涸而成梁故夏令曰十月成梁不使民患涉也

紀年曰周穆王七年大起師東至于九江架鼃鼃以為梁

崔鴻十六國春秋後燕錄曰慕容垂與劉牢之戰于五丈橋橋壞晉大敗車騎慕容德等引兵要牢之五丈橋

牢之馳馬跳五丈澗會符丕救至而免

孟子子產聽鄭國之政以其乘輿濟人於溱洧孟子曰
惠而不知為政

抱朴子曰尾生與婦人期橋下水至不去以至溺死雖
有信不如無也

王充論衡曰高麗國侍婢見氣如雞子來感之有娠生
子名東明東明善射王恐其害國欲殺之東明走至淹
水以弓擊水魚鼈浮而為梁既渡而魚鼈解散

諸葛亮集曰亮上書曰臣先遣孟琰據武功水東司馬懿因水以二十日出騎萬人來攻琰營作車橋賊見橋垂成便引兵退

堰埭

吳錄曰句容縣大皇時使陳勲鑿開水道立十二埭以通吳會諸郡故船行不復由京口

晉中興書曰兗州既平謝玄患水道險澁糧運艱難壅呂梁水立七埭以利運漕

又曰謝安築埭於新城北百姓賴之故名召伯埭

述征記曰秦梁埭到召伯埭二十里召伯埭到三救埭十五里三救埭到鏡梁埭十五里

晉書曰李矩與汝南太守袁孚率衆脩洛陽千金堰以利運漕

梁典曰天監十三年魏降人王足陳計求堰淮水以灌壽陽引北方童謠曰荆山為上格浮山為下格潼沱為激溝并灌鉅野澤武帝遂發衆築之令太子右衛率康

絢護堰作役人及戰士三十萬於鍾離南起浮山北抵
嶢石依岸以築土合脊於中流十四年四月堰將合淮
水剽疾輒復決潰衆患之或謂江淮之間多有蛟龍能
乘風雨決壞崖岸其性惡鐵因是引東西二冶故鐵器
大則釜鬲小則鋸鋤數千萬斤沉於堰所仍不能合乃
伐樹為井榦填以巨石加土其上緣淮百里內岡陵木
石無巨細必盡負擔者肩皆穿夏日疾疫死者相枕蠅
蚋晝合是冬寒甚淮泗盡凍士死者十七八至十五年

四月堰乃成其長九里下濶有四十丈上廣四十五丈
高二十丈軍人列居于上其水清潔俯視居人墳墓了
然皆在其下其壽陽戍因移置八公山上夾淮數百里
皆水之所淹人謂絢曰四瀆天所以節宣其氣不可久
塞既而昏霧三日而堰決殺萬人其聲若雷聞三百里
水中怪物隨流而下或人頭魚身龍形鳥首殊類詭狀
不可勝名其處為荆山堰今渦口東岸是

後周書賀蘭祥奏太祖以涇渭溉灌之處渠堰廢毀乃

命祥修造富平堰開渠引水東注於洛功用既畢民獲其利

唐書張守珪為都督瓜州地多沙磧不宜稼穡每年少雨以雪水溉田至是渠堰盡為賊所毀既地少林木難為修葺珪設祭祈禱經宿而山水暴至大漂材木塞澗而流直至城下守珪使取充堰於是水道復舊

晉後畧曰張方圍京邑決千金堰水溝渠枯涸井多無泉

鄴中記曰當魏文侯時西門豹為鄴令堰引漳水激鄴以富魏之河南後史起為鄴令引漳水十二渠灌漑於魏田數百頃魏益豐實後廢堰田荒魏時更修通水井堰鄴城西南漳水十八里中細流東注鄴城南二十里中作二十堰

語林曰陳協數日輒進阮步兵酒一壺後晉文王修九龍堰阮舉協文王用之掘地得古承水銅龍六枚堰遂成也

魏郡圖經曰愜山古堰也今謂之愜山即漢成帝時河決金堤蓋於此運土以塞河頗愜當時人心故謂之為愜山在今魏縣西

戴延之西征記曰金漈谷三水合處有千金竭音竭即魏

陳思王所立引水東灌民今賴之又九州要記洛陽千金竭傍有九龍祠存又地理書曰穀水出為湖溝費千金以堰之

太平御覽卷七十三

欽定四庫全書

太平御覽卷七十四

宋 李昉等 撰

地部三十九

塘

隄

島

嶼

澚

岸

泥

礫

沙

塘

錄異傳曰文翁者廬江人爲兒童時乃有神異及長當
初歷下岐以作田文翁盡日斫伐柴薪以爲陂塘其夜
忽有數百頭野猪以鼻戴土著柴中比曉成塘

吳地記曰壇塘一名陌城夫差十二年既殺子胥後悔
之與群臣臨江作塘創設祭奠百姓因以立廟吳越春
秋云夫差設祭杯動酒盡

劉道真錢塘記曰防海大塘在縣東去邑一里往時郡議曹華家甚富乃議立此塘以防海水始開幕有能運土石一斛即與錢一升旬日之間來者雲集塘未成而謫不復取於是載土石者棄置而去塘以之成既過絕潮源一境蒙利也

述異記曰今烏江長亭亭下有騅馬塘即當時烏江亭長艤舟待項王處

南越志曰丹城縣有釜塘金沙自是而出

裴淵廣州記曰彰平縣朱沙塘水如絳魚鼈皆赤

荊州記曰長沙郡東十餘里有郡人劉壽墓有石闕四
所壽漢順帝時為司徒其東有龜塘周廻四十五里有
靈龜出其中故塘因名焉

盛弘之荊州記曰始安熙平縣東南有山山西其形長
狹水從下注塘一日再見盈縮因名為潮汐塘

幽明錄曰耒陽縣東北有廬塘淹地八頃其深不可測
中有大魚常至五日一躍奮出水大可三圍其狀異常

每躍出水則小魚奔迸隨水上岸不可勝計

述異記云廬塘有蛟魚五日一化或為美婦人或為男子至於變亂尤多郡人相畏故不敢有害心蛟亦不能為計後為雷電殺之此塘遂涸

劉欣期交州記曰鑿南塘者九真路之所經去州五百里馬援積石為塘以通於海達於象浦建標為南極之界

淮南子曰壞塘取龜發屋求狸桀跖之徒君子不為

堤

爾雅䟽墳大防也謂堤雖水所皆有而河墳最大也

梁書曰始興忠武王憺

音炎

字僧達為荊州刺史遇大江

溢堤壞憺親率將吏冒雨築之水勢甚猛人皆恐懼或請避之憺曰王尊尚欲身塞河堤我心何獨以危避登堤嘆息遂輟膳而刑白馬以祭江神以身為百姓請命言終而水退堤出

郡國志曰長沙金牛堤漢武時有異人牽金牛走入此

堤內因以名焉

水經注曰涿郡王尊自益州刺史遷東郡太守河水盛溢泛浸瓠子金堤尊躬率吏民投沉白馬祈水神河伯親執圭璧請身填堤廬居其上吏民皆走尊立不動水齊足而止公私壯其勇節

又曰漢安帝永初七年令謁者太山茅岑於石門東積石八所皆如小山以捍衝波謂之八激堤

島

釋名曰海中可居曰島到也人所奔到

漢書曰田橫懼誅入居海島中

魏志曰王傾討句驪入沃沮人云嘗乘船捕魚風吹十日東得一島上有人常以七月取童女沉海

齊地記曰嶗山東北五里入海有管彥島是黃巾賊帥管承後也

又曰東牟城東有盤島城東北有牛島常以五月海牛及海狸與鳥產乳其上

嶼

臨海記曰去郡七里東有樊續嶼嶼上空冢裡猶餘敗鼓角或呼為樊府君墓今郡公田在此嶼下

許

爾雅曰岸下地曰許

詩曰綿綿葛藟在河之許

岸

爾雅曰重涯曰岸

詩曰高岸為谷

又曰淇則有岸

晉書曰殷仲堪於江濱見流棺而葬焉旬日之間門溝
忽起為岸其夕有人自稱感君之恩堪因問岸何祥也
答曰水中有岸曰州君將得州言終而沒至是果得荆
州也

水經注曰船官浦東即黃鵠山林間甚美譙郡戴仲若
野服居之山下謂之黃鵠岸

又曰昆明池有金堤石岸益州有金堤左思曰西踰金堤東越玉津

孫卿子曰泉生珠而岸不枯

泥

說文曰泥黑土在水中者也

易曰井泥不食舊井无禽

在井之下故稱泥井而泥則不可食

書曰淮海惟揚州厥土惟塗泥

詩舍神霧曰夫齊之地處孟春之位海岱之間土地汚

泥流之所歸利之所聚

傳曰晉楚將戰呂錡夢射月中之退入於泥

論語曰子夏云雖小道必有可觀者焉致遠恐泥是以

君子不為

小道今諸子書泥
滯陷不通也去聲

漢書溝洫志曰涇水一石其泥數斗且漑且糞長我禾

黍

又曰禹泥行乘橇

東觀漢記曰隗囂將王元說囂使背漢曰請以一丸泥

為大王東封函谷關此萬世一時也

又曰鄧訓將黎陽宮兵屯漁陽遷護烏丸校尉黎陽宮故吏皆戀慕知訓好以青泥封書從黎陽步推鹿車載青泥至上谷遺訓其得人心如此

隴右記曰武都紫水有泥其色亦紫而粘貢之用封璽書故詔誥有紫泥之封

帝王世紀曰周穆王征犬戎得鍊剛赤刀用之割玉如割泥焉

神仙傳曰童奉君居廬山嘗大旱縣令于士彥詣奉說
大旱之意奉因仰視其屋曰貧家屋皆見天不可以得
雨如何令解其意身率將吏為起屋屋成當泥壁作人
已掘土欲取江水沃泥奉曰不須日暮當雨也其夜果
大雨聚壤成泥

顧微廣州記曰鬱林郡山東南有池有石牛在池下民
常祀之歲旱百姓殺牛祀之以牛血和泥泥石牛背祀
畢天雨洪注洗背泥盡而後晴

曾子曰白沙在泥與之皆黑

淮南子曰琬琰之玉在污泥之中雖廉者不釋也

世說曰石崇以椒為泥泥屋王君夫以赤石脂泥壁
雜五行書曰二月上壬取土泥屋四角蠶吉

礫

釋名曰小石曰礫礫者折也小石相支其間折折然
抱朴子曰軍術曰地生瓦礫不去有大禍

蔡伯喈青衣賦曰金生沙礫珠出蚌泥

盧子雲相風賦曰楚石雜結綠沙礫廁隋珠

沙

龍魚河圖曰蚩尤兄弟八十一人並銅頭鐵額食沙石
韓詩外傳曰孔子南遊適楚至於阿谷之隧有女子佩
瑱而浣者孔子曰彼婦人其可與言乎執觴以授子貢
曰善為之辭婦人答曰阿谷之隧隱曲之泥欲飲則飲
何問於婢子授子貢觴跪坐置之沙上曰禮不親授
又曰西河至於流沙千里而遙

雍州是也

家語曰得其人如聚沙而雨之非其人如會鼙而鼓之
史記曰張良以鐵椎擊秦始皇於博浪沙中其副車

又曰上在雒陽南宮從複道望見諸將往往相與坐沙
中語

又曰武帝元封元年旱於是天子乃禱萬里沙

應劭注
曰萬里

沙
祠

戰國策曰齊襄王立田單相之過淄水有老人涉淄而
寒不能行坐沙中田單見其寒也解裘而衣之襄王曰

弗早圖恐後悔之

疑單有異心也

漢書曰韓信擊龍且夾睢水夜令人為萬餘囊盛沙以壅水上流

東觀漢記曰朱鮪等共會洧水上沙中設壇立聖公為天子

博物志曰石蕃衛臣也背能負千二百石沙

廣志曰流沙在玉門關外南北二千里東西數百里有三斷名曰三隴

列子曰牛缺者上地之大儒過邯鄲遇盜於耦沙

魯連子曰朝露之蒲工女不能治溜澠之沙計兒不能數

韓子曰孫叔敖請漢間之地沙石之處

曾子曰白沙在泥與之皆黑

淮南子曰河水欲清沙壤穢之

又曰寒凝水熱焦沙

抱朴子曰穆王南征一軍盡化小人為蟲沙

說苑曰湯之時大旱七年焦沙爛石

葛洪肘後方曰治溺水方熬沙以覆死人使上下有水俱出口鼻

古今注曰宣帝地節元年上都沙中夜風有火如粟

曹瞞傳曰操征馬超隔渭水婁子伯說曰今天寒可起沙為城以水灌之可一夜而成

劉根別傳曰潁川太守高府君到官民人疫郡中吏民死者過半夫人郎君悉得病從根求消除病氣之術根

曰於廳事之亥上穿地取沙三斛著室中醇酒三升沃其上府君從之病者悉得愈疫氣絕

搜神記曰有物處于江水其名曰蜮一曰短狐能含沙射人以術方抑之則得沙石於肉中

段國沙州記曰澆河西有黃沙沙南北一百二十里東西七里西極大楊川望黃沙猶人委乾糞地不生草木黃沙蕩然沙州取號焉

豫章記曰龍沙在郡北帶江沙甚潔白高峻而峙陂陁

有龍形舊俗九月九日登高

新安記曰錦沙村傍山依壑素波澄漾錦石舒文冠軍
吳喜聞之而造焉鼓施遊泛彌旬忘返歎曰名山美石
故不虛賞使人喪朱門之志

王孚記曰袁州有水春交則上白沙如米於兩岸九十
餘里呼為米沙若一岸徧米其方豐熟

湘中記曰白沙如霜雪赤岸似朝霞

遁甲開山圖曰沙土之浦雲陽之墟可以長生可以隱

居沙土即長沙也雲陽古仙人也

郡國志曰浙江杭州有江沙漲昔武烈為郡吏赴府鄉人餞之會此沙上父老曰此沙狹而長君必為長沙太守果然

又曰伊州鐵勒國也而路多沙磧磧內時聞叫喚聲不見人或聞歌笑之聲蓋鬼物也

鄱陽記曰新昌水有一沙堆在縣東北五十里其形狀如釜然鮮淨特異每年豐稔其沙郡堆積如舊若沙移

河岸其年儉古來相傳以為常驗

太平御覽卷七十四

欽定四庫全書

太平御覽卷七十五

宋 李昉等 撰

地部四十

溝

瀆

渠

圳

澮

汎

灣

浦

溝

釋名曰田間之水曰溝溝者構也從橫相交構也

爾雅曰谿注谷曰溝

周禮曰匠人為溝洫九夫為井間廣四尺深四尺謂之溝方十里為城城間廣八尺深八尺謂之洫

傳曰梁伯好土功乃溝公宮

又曰魯將與齊戰師不踰溝樊遲曰請三刻而踰之衆從之

又哀元年吳城邾溝通江淮杜預曰於邾江築城穿溝
東北通射陽湖西北至朐口入淮通糧道也今廣陵邾
江是又史記云邾溝即吳王夫差所開漕運以通上國者
國語曰吳王夫差殺申胥不稔於歲稔謂歲熟也乃起師北
征開為深溝通於商魯之間開掘地商宋也北屬之沂西屬之
濟以會晉定公于黃池

論語曰禹盡力於溝洫

史記曰漢王四年王軍廣武關中兵益出當此時彭越

起兵居梁地往來略楚兵絕其糧道齊王信又進擊楚
項羽恐乃與漢王約中分天下割鴻溝而西者為漢鴻
溝而東者為楚項羽歸漢王父母妻子軍皆呼萬歲羽
解而東漢王欲引而西用張良陳平計乃進兵追項羽
博物志曰徐偃王治其國仁義著聞欲周行上國乃通
溝陳蔡之間得朱弓朱矢

酈道元水經注曰高唐縣有甘棗溝水側多棗故俗取
名溝焉

又曰酒泉延壽縣南有山石水出于莒地為溝

殷氏世傳曰殷褒為滎陽令先多霖雨百姓饑饉褒乃穿渠入河四十餘里疏導原隰用致豐年民賴其利號曰殷溝而頌之

莊子曰尋常之溝洫巨魚無所還其體而鯢鮪為之制孟子曰思天下之民匹夫匹婦有不被堯舜之澤者若已推而內之溝中

楊子圖經曰六合縣東三十里從岱石湖入四里至溝

中心與陵分界按後漢書張綱為廣陵太守濟惠於百姓勸課農桑於東陵村東開此溝引湖水灌田以此號為張綱溝

阮勝之記曰吳王淝開茱萸溝通運至海陵倉北有茱萸村故以村立名

崔豹古今注曰長安御溝謂之楊溝謂植高楊於其上也一曰羊溝謂羊喜抵觸垣故為溝以隔之因曰羊溝也

古詩曰今日斗酒別明日溝水頭蹀躞御溝上溝水東西流

瀆

禮記月令曰季春之月道達溝瀆開通道路

爾雅曰溝注澮曰瀆

漢舊儀曰祭四瀆用牲

崔鴻十六國春秋前秦錄曰建元十二年堅以關中水旱不時議仿鄭白故事發王侯以下及豪強富民僮隸

三萬人開涇水上源鑿山起堤通渠引瀆以溉田民賴其利

伏滔北征記曰姑熟西北有甘寧墓孫皓時占者云墓有王氣皓鑿其後十許里曰直瀆

越絕書曰銅姑瀆長一百五十步去縣二十里

渠

史記河渠書曰禹以為河所從來者高難以行平地數為敗乃醜二渠

漢書音義曰醜分也

以引其河載之高地過降水

至于大陸播為九河也鄭國閒說秦令鑿涇自中山南
西交瓠口為渠溉斥鹵之地四萬餘頃收皆畝一鍾於
是關中為沃野無凶年秦因以富強卒併諸侯因命曰
鄭國渠

漢書曰禹作二渠以引河武帝時穿渠水岸苦崩乃鑿
井相通行水井渠之生自此始穿得龍骨故名龍骨渠起
谷口入櫟陽注渭中名白渠民得其饒歌曰田於何所
池陽谷口鄭國在前白公起後舉鍤為雲決渠為雨

又曰張掖郡有千金渠

范曄後漢書曰樊密所起盧舍皆有深堂高閣陂渠灌
注又池魚牧蓄有求必給

魏志曰遼西單于冒頓尤強公將征之鑿渠自潯沱入
孤水名平虜渠又從洶河口鑿入潞河名泉州渠以通
海

又曰建安十八年九月鑿渠引漳水入白溝以通河

又曰賈逵為豫州刺史通運渠二百餘里所謂賈侯渠

北史曰郭衍為開漕渠大監部率水工鑿渠引渭水經大興城北東至于潼關漕運四百餘里關中賴之名曰富人渠

隋書謝胄為兗州刺史先是兗州城東沂泗二水合而南流沉濫大澤中胄遂積石堰之使決令西注陂澤盡為良田又通轉運利盡淮海百姓賴之號為謝公豐兗渠

唐書曰溫造為郎州刺史在任開後鄉渠九十七里溉

田二千頃郡人獲利乃名為右史渠造自起居舍人出郡

水經注曰漢司空漁陽王梁之為河南也將引穀水以溉京師渠成而水不流故以坐免後張純堰洛以通漕洛中公私懷贍是以渠今引穀水蓋純之創也

又曰漢明帝之世司徒伏恭薦王景善能治水顯宗詔典謁者吳始作浚儀渠吳用景法水乃不害此即景時所修故瀆也渠流東注浚儀故復謂之浚儀渠也明帝

十五年東巡狩至無鹽帝嘉景功拜河堤謁者

又曰魏武帝又堰漳水迴流東注世號天井堰二十里
中作十二塏塏相去三百步令互相灌注一原分為十
二流皆懸水門自城西東入經銅雀臺下伏流入城東
流謂之長明渠

戴延之西征記曰洛陽城外四面有陽渠水周公所制
也建春門外二橋最大縱一橫一

續述征記曰案河渠書溝洫志引河為洪溝一說秦至

魏鑿渠引河灌大渠名曰洪溝焉

崔寔政論曰戰國海內十二分魏州有史起引漳水灌鄴民以興歌蜀郡李冰鑿離堆通二江益郡至今賴之秦開鄭國漢作白溝而關中號為陸海

郡國志瀛州平舒縣古五渠水魏延興初文安縣人孫願等捕魚此水先祭忽有羣魚從西而來有一人異甚謂願曰若得大魚勿殺及下網果得大魚乃殺之腹中得尺素祭而食之羣魚並飛遂不復得因名此處為飛

魚口

鄴城故事曰西門豹為令造十二渠決障水以溉民田
因是戶口豐饒今渠一名安澤陂是

南康圖經曰前漢兒寬遷內黃令吏民大信表開六輔
渠以溉灌獲利因名曰兒公渠

圳

說文曰圳水流也

周禮曰倍洫曰圳

嵇康養生論曰或益之以圳澮

澮

說文曰澮水流澮澮也廣二尋深二仞

書曰予決九川距四海澮畎澮距川

爾雅曰谷注溝曰澮

釋文曰澮會也小溝之所會也

汎

續述征記曰齊人謂湖為汎汎中有九十九臺皆生葦

蒲焉

風俗通曰汎莽也言其平望汎莽無崖際也

灣

酈善長注水經曰汎水又東歷臨縣西為明月池白壁灣灣狀半月清潭鏡澈上則風籟空傳下則泉響不斷行者莫不擁櫂嬉游徘徊愛翫

江夏記曰敗舶灣在縣西北七里按吳志云孫權與羣臣泛觴於大船江中西上逢惡風權遣舵工張頡取灘

洲谷利拔劍擬舵工急取樊口未及至口灣中船破因
名敗舶灣權至岸謂谷利曰何怯於水也谷利曰大王
萬乘之主欲涉不測之淵一旦傾危社稷何寄因登陸
路而歸

潯陽記曰蠡湖西灣夏秋水渺漲商徒縈紆牽舟循繞
人力疲勞號為西疲灣亦云西灣又有白漕灣亦在湖
西汎漲驚波似雪洶湧漕灣因是名焉又有落星灣灣
內有落星石週圍百步許又有神林下有廟祈福而獲

前進由是名焉又有女兒廟禱祈亦有靈應即不許所
值亦無害

永嘉郡記曰樂城縣三原亭去郡百二十里溪水清如
鏡曩昔有得一死鮎者鬚大五六圍一鬚輒得數十斛
鮎此灣無所不容有人能食者常自譬腹如三原灣無
所不容

水經注曰渭水東南與神澗水合開山圖所謂靈泉池
也俗名之為萬石灣泉深不測實稱靈異先後漫遊者

多罹其害

鄱陽記曰清灣在縣東南七里隋開皇中太守梁文謙蒞官清潔取此灣水以自供後人思其德號為清灣

浦

說文曰浦水濱也

詩曰率彼淮浦省此徐土

郡國志曰夏曰浦有龍魚昔禹南濟黃龍夾舟之處

楚詞曰望涔陽之極浦

述異記曰上虞縣有石駢步水際謂之步也瓜步在吳中吳人賣瓜於江畔因以名也江中有魚步龜步湘中有靈妃步按吳楚間謂浦為步蓋語訛耳

吳錄曰富陽浦濮宋為吳縣之津吳大帝時有浦通浙江至廬溪故曰桐廬縣東有大溪注廬口淥波青巖昔晉徵士散騎侍郎戴勃遊此自言山水之極致也

郡國志曰金陵西浦亦云項口即張碩捕魚遇杜蘭香處也

江夏記曰南浦在縣南三里離騷曰送美人兮南浦其
源出京首山流入大江春冬涸竭秋夏泛漲商旅往來
皆於浦停泊以其在郭之南故稱南浦

續搜神記曰廬江箏笛浦浦中有大舶覆水內漁人宿
旁聞箏笛之聲及香氣氤氲云是曹公載妓船覆於此

太平御覽卷七十五

欽定四庫全書

太平御覽卷七十六

宋 李昉等 撰

皇王部一

敘皇王上

敘皇王上

尚書緯曰帝者天號王者人稱天有五帝以立名人有三王以正度天子爵稱也皇者煌煌也

洛書曰皇道缺故帝者興

易坤靈圖曰在政不私公位稱之曰帝

易緯曰帝者天號也德配天地不私公位稱之曰帝天子者繼天治物改正一統各得其宜父天母地以養生人至尊之號也大君者君人之盛也

易坤鑿度曰帝王興亡必察八部觀卦之符物之應動又曰興於仁立於禮畢於義定於信成於智五者道德之分天下之際聖王之所以通天意而明至道也

又曰王者天下所歸天子者繼天理物改一統政大君者人君之盛德大化行於萬人宜處王者施大化為大君也

周書曰三王之統若循環周則復始窮則反本尚書大傳曰三王之治如環之無端如水之勝火

又曰古者天子有四隣前曰疑後曰丞左曰輔右曰弼有問無以對責之疑可志而不志責之丞可正而不正責之輔可揚而不揚責之弼

韓詩外傳曰明王有三懼一曰處尊位而恐不聞其過
二曰得志而恐驕三曰聞天下之至道而恐不能行

又曰君者羣也羣天下萬民除其害者謂之君王者往
也天下往之善養生人者也故人尊之善辯治人者也
故人安之善顯設人者也故人親之善粉飾人者也故
人悅之四德具而天下往之四德無一而天下去之往
之之謂王去之之謂亡故曰道存則國存道亡則國亡
大戴禮曰古者天子常以季冬考德以觀治亂得失

又曰昔堯取人以狀舜取人以言湯取人以聲文王取人以度

禮曰君天下曰天子

又曰天子以德為車以樂為御

又曰昔先王尚有德尊有道任有能舉賢而置之聚眾以誓之是故因天事天因地事地

又曰帝嚳能序星辰以著眾堯能賞均刑法以義終舜勤眾事而野死鯀障洪水而殛死禹能修鯀之功黃帝

正名百物以明民共財顓頊能修之湯以寬治民而除其虐文王以文治武王以武功去人之災此皆有功烈於人者也

又曰王天下有三重焉其寡過矣乎

又曰孔子曰大道之行也與三代之英丘未之逮也而

有志焉

大道謂五帝時也

大道之行也天下為公選賢與能講

信修睦故人不獨親其親不獨子其子使老有所終壯有所用幼有所長是故謀閉而不興盜竊亂賊而不作

故外戶而不閉是謂大同

又曰故聖人作則必以天地為本以陰陽為端以四時為柄以日星為紀月以為量鬼神以為徒五行以為質禮義以為器人情以為田四靈以為畜

又曰故聖人修義之柄禮之序以治人情故人情者聖人之田也

禮斗威儀曰帝者得其英華王者得其根核霸者得其附枝故帝道不行不能王王道不行不能霸霸道不行

不能守其身

禮含文嘉曰山澤者三皇五帝之感應

春秋演孔圖曰正氣為帝間氣為臣宮商為姓秀氣為人

又曰天子皆五帝精寶各有題序次運相據起必有神

靈符紀諸神扶助使開階立遂

遂當作
隧道也

又曰王者常置圖籙坐旁以自立

春秋元命苞曰皇者煌煌也道爛然顯明帝者諦也

春秋文耀鉤曰王者往也神所向往人所歸樂

春秋運斗樞曰伏羲女媧神農是謂三皇也皇者合元履中開陰布綱指天畫地神化潛通

春秋合誠圖曰大帝之精起三河之州中土之腴

又曰大帝冠五彩衣青衣黑下裳抱日月日在上月在

下黃色正方居曰間名曰五光

正黃而名之曰五光者蓋以黃為質而衆彩就

飾之故曰五色此

大帝人象旁文也

春秋保乾圖曰天子至尊也神精與天地通血氣含五

帝精

人受天地氣而生
故神精與天地通

天愛之子之也

春秋佐助期曰天子法斗諸侯應宿

春秋潛潭邑曰天子有三寶

謂璇璣玉衡律度也

春秋繁露曰德似天地者稱皇帝天祐而子之號稱天子

孝經援神契曰王德珍文備象連表萬精曲飾題類設術修經窮仁尚義祖禮行信握權任智順道行仁俱在至德

孝經鈎命訣曰三皇步五帝驟三王馳五霸鶩或稱帝

王接上稱天子明以爵事天接下稱帝王明以號令臣
下

論語摘纂聖承進曰帝不先義尚道德王不先力尚仁
義霸不先正尚武力

論語撰考識曰考靈差德知堯步舜驟禹馳湯驚德有
優劣故曰行轉疾也

家語曰孔子觀乎明堂覩四門之墉有堯舜桀紂之象
又有周公相成王之圖孔子謂從者曰夫明鏡所以察

形往古所以知今

又曰季康子問於孔子曰舊聞五帝之名而不知其實
請問何謂孔子曰昔丘也聞諸老聃天有五行金木水
火土分時化育以成萬物其神謂之五帝古之五帝古
之王者取法五行五行更王始終相生亦象其義也故
其生為王者而死配五行

白虎通曰帝王者號也號者功表也所以表功明德號
令臣下德合天者稱帝仁義合者稱王別優劣也

又曰皇君也美也大也天人之總美大之稱也時質故
總稱之

漢書曰堯舜禹稷與之為善則行驩兜欲與為惡則誅
可與為善不可與為惡是謂上智桀紂龍逢比干欲與
為善則誅子華崇侯與之為惡則行不可與為善可與
為惡是為下愚

應劭漢官儀曰皇者大也言其煌煌盛美帝者德象天
地言其能行天道舉措審諦父天母地為天下主

漢雜事曰漢有天下號曰皇帝自稱朕人臣稱之曰陛下其命令制誥衣冠車馬器械百物曰乘輿所在曰行

在所至曰幸所居曰某禁中所進曰御

天子至尊不敢褻瀆之故託於

乘輿天子以天下為家不以京師宮室為常處則當乘輿以行天下猶調之車駕今雖在京師京師言行在所巡狩天下所奏事處皆為宮在長安則曰長安宮在泰山則曰奉高宮唯當時所至

帝王世紀曰天子至尊之定名也應神受命為天所子故謂之天子孔子曰天子之德感天地動八方是以功合神者稱皇德合天地稱帝義名曰稱王

韋曜洞紀曰自天地剖判君世宰人可得而言者惟庖犧畫卦神農作稼黃帝輿服最為昭顯其餘非書記所述難可紀焉

六韜曰王者之道如龍之首高居而遠望深視而審聽神其形而散其精若天高而不可極若淵深而不可測故可怒而不怒臣乃為虎可殺而不殺大賊乃發

又曰昔栢皇氏栗陸氏驪連氏軒轅氏赫胥氏尊盧氏祝融氏此古之王者也未使民民化未賞民民勸此皆

古之善為政者也至於伏羲氏神農氏教化而不誅黃
帝堯舜誅而不怒古之不變者有苗有之堯化而取之
堯德衰舜化而受之舜德衰禹化而取之

太公伏符陰謀曰武王曰三皇之時無禮義而民利之
何也太公曰三皇之時近之則利去之則病所謂上聖
神德而治其次教而化之近聖賞罰之

管子曰黃帝有明臺之議上觀於賢也堯有衢室之問
下聽於民也舜有告善之旌而主不蔽也禹立諫鼓於

朝而備訊謠也湯有總街之庭觀民誹也武王有靈臺之宮賢者進也此古聖帝明王所以有而勿失得而勿亡也

又曰明道者皇察道者帝通德者王謀得兵勝者霸

又曰桓公問曰三王者既殺其君矣今言仁義則必以三王為法度不識其故何也對曰昔者禹平治天下及桀而亂之湯放桀以定禹功也湯平治天下及紂而亂之武王伐紂以定湯功也善之伐不善自古至今未有

改之君何疑焉

又曰言室滿室言堂滿堂是謂聖王

又曰昔者七十九代之君法制不一號令不同然俱王天下者何也必國富而粟多也夫富國多粟生於農故先王貴之

晏子曰古者有紼衣攣領而王天下者有處槽巢窟穴而王天下者

老子曰聖人處無為之事行不言之教萬物作而不辭

生而不有為而不恃功成而不居夫惟不居是以不去
又曰不尚賢使民不爭不貴難得之貨使民不為盜不
見可欲使心不亂是以聖人之治虛其心實其腹弱其
志強其骨常使民無知無欲無知者不敢為也無為則
無不治也

又曰道大天大地大王亦大域中有四大而王居其一
又曰聖人無常心以百姓心為心善者吾善之不善者
吾亦善之得善矣信者吾信之不信者吾亦信之得信

矣聖人在天下翕然為天下渾其心百姓皆注其耳目
聖人皆孩之

又曰聖人之言云我無為而民自化我無事而民自富
我好靜而民自正我無欲而民自樸

又曰聖人執左契而不責於人故有德司契無德司轍
聖人之心與百姓心猶左右契耳契合則和故上下相
親怨誹不作後世不能執左契以應物而守常轍以軌
民此求合必有餘怨矣

又曰江海所以能為百谷王者以其善下之也是以聖

人欲上人也必以其言下之欲先人也必以其身後之故處上弗害是以天下樂推而不厭也

董子曰為天子不可不承天意必順其道然後為安

又曰古之造文字者三畫而謂之王三者天地人也連其中者通其道也

孟子曰人皆有不忍人之心

言人人皆有不忍加慈於人之心也

先王有

不忍人之心斯有不忍人之政矣以不忍人之心行不忍人之政治天下可運之掌上

又曰五霸者三王之罪人也

趙臺卿章句曰五霸大國康政以率諸侯也齊桓晉

文秦穆宋襄楚莊是也三王夏禹商湯周文武也

今之諸侯五霸之罪人也天

子討而不伐諸侯伐而不討

荀卿子曰人君者降禮尊賢而王重法愛人而霸好利多詐而危欲近四旁莫如中央故王者必居天下之中也

又曰粹而王駁而霸無一焉而亡

又曰國者天下之利用也人主者天下之利勢也得道

以持之則大安也大榮也積善之源也不得道以持之則大危也大累也義立而王信立而霸權謀立而亡行一不義殺一無罪而得天下仁者不為也

莊子盜跖篇曰古之禽獸多而人民少於是人皆巢居以避之晝拾橡栗暮栖木上故命之曰有巢氏古者人不知衣服夏則多積薪冬則煬之故命之曰生知之民神農之代卧則居居起則于于知其母不知其父與麋鹿同處耕而食織而衣無有相害之心此至德之隆

也

又曰夫帝王之德以天地為宗以道德為主以無為為常無為也則為天下用而不足

又曰天道運而無所積故萬物成帝道運而無所積故

天下歸聖道運而無所積故海內服

此三者德物之性而無所牽滯

於天通於聖六通四辟於帝王之德者其自為也夫虛靜恬淡寂寞無為者萬物之本也以此處上帝王天子之德也

又曰廣成子曰得吾道者上為皇而下為王

郭璞曰皇王之稱隨

世之上下耳其於得通變之道以應無窮一也

失吾道者上見光而下為土

失無

窮之道則自信於一變而不能均同上下矣故俯仰異心也

又曰赫胥氏之時民居不知所為行不知所之含哺而

熙鼓腹而遊

又曰昔容成氏大庭氏柏皇氏中央氏栗陸氏驪連氏

軒轅氏赫胥氏尊盧氏祝融氏伏羲神農氏當是時也

結繩而用之

郭象曰足以紀要而已也

甘其食美其服

適故常甘當故常美若思

侈靡則無
時嫌矣

樂其俗安其居隣國相望雞狗之音相聞民

至老死不相往來

無求之至也

若此者則至治也

又曰古之王天下者知雖落天下不自慮也辯雖彫萬物不自說也能雖窮海內不自為也天不產而萬物化地不長而萬物育帝王無為而天下功故曰莫神於天莫富於地莫大於帝王故曰帝王之德配天地乘天地馳萬物而用人君之道也

又曰至德之世不尚賢不使能民如野鹿正而不知以

為義相愛而不知以為仁寶而不知以為忠當而不知以為信

又曰聖人之靜也非曰靜也善故靜也萬物無足以撓心者故靜也

郭象曰撓亂也

夫虛靜恬淡寂寞無為者天地之

平而道德之至故帝王聖人休焉

唐子曰君人者乘南面之位操殺生之柄威如秋霜恩如春養何求而不得何化而不從人君也當以江海為腹山林為面當使其觀者不知江海何藏山林何有

蘇子曰天子坐九重之內樹塞其門旒以翳明衡以隱聽鸞以抑馳

陸子曰三皇垂策而五帝繁手唐虞按轡禹湯馳轅雖使周公御衡仲尼促節固不已也

孫綽子曰道一者帝德充者王依仁仗義者霸無為而治者道也為能不恃者德也存三亡國仁也責貢不入義也

慎子曰昔者天子手能依而宰夫設服足能行而相者

導進口能言而行人稱辭故無失言失禮也

又曰古者立天子貴之者非以利一人曰天下無一貴
則禮無由通通理為天下也故立天子為天下也非立
天下為天子也立國君以為國也非立國以為君也

太平御覽卷七十六

欽定四庫全書

太平御覽卷七十七

宋 李昉等 撰

皇王部二

敘皇王下

敘皇王下

呂氏春秋曰性生之者天也養成之者人也能養天之所生而勿撓之謂之天子帝者天下之所適也王者天

下之所往也

又曰天地大矣生而弗成子而弗有

天地至大生育人民不以為已子也

成遂萬物不以為已有也

萬物皆被其澤得其利而莫知其所由始

此三皇五帝之德也

又曰黃帝曰茫茫昧昧因天之威與元同氣

高誘曰茫茫昧昧廣

大貌也因天之威無不敗也與元同氣無不協也

故曰同氣賢於同義同義賢

於同力同力賢於同居帝者同氣

同元氣也

王者同義

同仁義也

霸者同力

同武力也

又曰軍必有將所以一之也

高誘曰將主也

國必有君所以一

之也天下必有天子所以一之也天子必執一所以博之也

又曰五帝固相與爭也遞興遞廢勝者用事

又曰蚩尤作兵也利其械

高誘曰蚩尤少吳氏之末九黎之君名也始作亂伐無罪

殺無辜善用兵為無道非始造之也故非作兵者也

未有蚩尤之時民固剥林木

以戰矣勝者為長

長率也

長猶不足以治之故立君君又

不足以治之故立天子

又曰人固不能自知人主獨甚存亡安危勿求於外

高誘

曰言皆在己

務在自知堯有欲諫之鼓

欲諫者擊其鼓

舜有誹謗之

木

書其過失於表木也

湯有司過之士

司主也過闕也

武王有戒慎之鞬

欲武者搖其鞬

猶恐不能自知

尚恐不能自知過也

今賢非堯舜湯武而

有揜蔽之道奚由自知哉

又曰五帝先道而後德故德莫盛焉三王先德而後事

故功莫大焉五伯先事而後兵

五伯昆吾大彭豷韋齊桓晉文是也

故兵

莫強焉

又曰凡為天下治國家必務本而後末所謂本者非耕稼種植之謂也務本莫貴於孝人主尊孝則名章榮下服聽天下譽人臣孝則事君忠處官廉臨難死士民孝則耕耘疾守戰固不敗此夫孝者三皇五帝之本務而萬民萬事之紀也夫執一術而百善至百邪去天下從者其惟孝乎

又曰古先聖王之所以導其民者先務於農民農非徒為地利也貴其志也民農則樸樸則易用易用則邊境

安主位尊民農則重重則少私議少私議則公法立力
專一民農則其產厚其產厚則重徙重徙則死其處而
無二慮

又曰昔先聖王之治天下也必先公公則天下平矣嘗
試觀於上古

古記也

有天下者衆矣其得之必以公其失

之必以偏凡主之立也生於公故鴻範曰無偏無黨

又曰昔舜欲稽古而不成既足以成帝矣禹欲帝而不
成既足以成王矣湯欲繼舜而不成既足以成田荒矣

武王欲及湯而不成既足以為諸侯長矣

董仲舒答問曰三皇三才也五帝五常也三王三明也

五霸五嶽也

淮南子曰至德之世

謂太古三皇之時

其曠乎混淆之域而徒

倚乎瀾漫之宇提挈天地委萬物以鴻濛為景性而淳

樸乎無畛崖之際是故聖人呼吸陰陽之氣而羣生莫

不喁喁然仰其德和順止當此之時莫不領理決離隱

慙而自成渾渾若若純樸未散滂薄為一而萬物大優

是故雖有明知無所用之

又曰古者至德之世賈使其肆農樂其業大夫安其職而處士循其道當此之時風雨不毀折草木不夭死九

鼎重

王者之德休明則鼎重姦回淫亂則鼎輕也

珠玉潤澤洛出丹書河出

錄圖故許由方回

堯使方回求子列藥得之

善卷披衣得達其道何

也其主有欲利天下之心是以人得自樂其間四子之才非能盡大蓋今之世也然莫能與之同光者遇唐虞之時也

又曰人主之居如日月之明也天下之所同側目而視
傾耳而聽延頸舉踵而望也是故非淡泊無以明志非
寧靜無以致遠非寬大無以廉覆非慈厚無以懷衆非
平正無以制斷

又曰古者有整而綖領以王天下者矣

古者蓋三皇以前也整頭著叟

整帽言未知制冠也綖領皮衣屈而袂之如今胡家常
襲文攝以為領也一說整放髮也綖領頭而已皆無飾
也

其德生而不辱

刑措不用也

予而不奪

予其則也不奪無所欲求於民也

天下不非其服同懷其德

非猶譏也懷歸

當此之時陰陽和平

風雨時節

萬物蕃息

政不虛生無夭折

鳥鵲之巢可俯而探也禽獸

可羈而從也

從猶牽也

豈必褒衣博帶句襟委貌章甫哉

又曰國之所以存者道德也

道德施行民悅其化故國存也

家之所以

亡者理塞也

理道

堯無百戶之郭舜無植錐之地以有天

下禹無十人之衆湯無七里之分以王諸侯文王處岐

周之間地方不過百里而立為天子者有王道也

又曰聖人不貴尺璧而重寸陰時難得而易失也禹之

趨時也履遺而弗納冠掛而不顧非爭其先也而爭其

得時也是故聖人守清道而抱雌節

清和靜也雌柔弱也

因循應

變常後而不先柔弱以靜舒安以定

舒詳也

攻大磨堅莫

能與之爭

攻大磨堅喻難也

又曰帝者體太一王者法陰陽霸者則四時君者用六

律體太一者牢籠天地彈壓山川含吐陰陽申曳四時

紀綱八極經緯六合覆露照導普記而無私

普天記衆也無私愛

憎言昏公也

翻飛蠕動莫不仰德而生法陰陽承天地之和

形萬殊之體含氣化物以成埤類

埤形也

盈縮卷舒淪於

不測

盈長縮短卷屈舒散入於不可測盡之源也

終始虛滿轉於無源則四

時者春生夏長秋收冬藏取與有節出入有時開闔張

翕不失其序喜怒剛柔不離其理用六律者生之與殺

也賞之與罰也與之與奪也非此無道也

明四時六律之君非用此

數事其餘無他道也

又曰古之立帝王者非以養其欲也聖人之踐位者非以供樂其身也為天下強掩弱衆暴寡詐欺愚勇侵怯懷知而不以相教積財而不以相分故立天子以齊一

之

又曰五帝三王之法籍風俗一世之跡也譬若土龍芻狗之始成文以青黃飾以綺繡纏以朱絲及其已用則壤土草芥而已誰貴之哉

又曰神農無制令而人從唐虞有制令而無刑罰夏后氏不負言殷人誓周人盟

又曰聖人在上位者賞罰不施而天下賓服日計之不

足而歲計之有餘

譬若百梅足為百人酸一梅不足為一人酸也

又曰使堯度舜則可使桀度堯是猶以升量石也

又曰同氣者帝同義者王同力者亡

又曰太古二皇

許植曰庖犧神農

德於中央德覆天地而和陰

陽節四時調五行虹蜺不出賊星不行

五星逆行謂之賊星也

又曰人主者以天下之目視以天下之耳聽以天下之

智慮以天下之力動是故號令能下究而臣情得上聞

百官修通羣臣輻湊喜不以賞賜怒不以罪誅故威令

立而不廢聰明光而不蔽法令察而不苛耳目達而不

聞善否之情陳於前而無所逆

揚子法言曰五常者帝王之事古寧有書不由筆言不由舌哉

桓譚新論曰儒者或曰圖王不成其弊可以霸此言未是也

傳曰孔氏門人五尺童子不言五霸事者惡其違仁義而尚權詐也

又曰夫上古稱三皇五帝而次有三王五霸此皆天下

君之冠首也故言三皇以道治五帝用德化三王由仁義五伯以權智其說之曰無制令刑罰謂之皇有制令而無刑罰謂之帝賞善誅惡諸侯朝事謂之王興兵約盟以信義矯世謂之伯也

論衡曰古之帝王建鴻德者須鴻筆之臣褒頌紀德也潛夫論曰天作道皇作極臣作輔人作基

又曰王之政普覆兼愛吉凶禍福與人共之

春秋運斗樞曰皇天不言四時行焉百物生焉垂拱無

為謹言而民不違道德玄泊有皇天故曰皇皇者中也
光也合元履中開陰布綱上合皇極其施光明指天畫
地神化潛通煌煌盛美不可勝量

又曰大傳說燧人為燧皇伏羲為羲皇神農為農皇也
燧人以火紀火陽也陽尊故託燧皇於天伏羲以人事
紀故託羲皇以人蓋天非人不固人非天不成也神農
悉地力植穀故託農皇於地天地人之道備而三皇之
運興矣

又曰五帝易傳禮記春秋國語太史公記黃帝顓頊帝
嚳帝堯帝舜是五帝也謹按易尚書大傳立五帝以為
相四時施生法度明察春夏慶賞秋冬刑罰帝者任德
設刑以則像之言其能行大道舉措審諦也黃帝者先
也厚也中和之色德施四季與地同功故先王以別之
也顓者專也頊者信也懋也言其承文易之以質使天
下遵化皆貴貞懋也嚳者考也成也言其考明法度美
譽醇然若酒之芬香也堯者高也言其隆興煥炳最高

明也舜者准也循也言其准行道以循堯緒也

又曰禮號謚託設夏禹殷湯周武王是三王也禹者輔也輔續舜後庶績洪茂自堯以上王者子孫據國而起功德浸盛故造美謚舜禹本以白衣砥行顯名升為天子雖復制謚不如名著故國名焉湯者攘也言其攘除不軌改亳為商成就王道天下熾昌文武皆以其長夫擅國之謂王能制殺生之威之謂王王者往也天下所歸往也

又曰易稱天先春而後秋地先生而後凋日月光而後幽是以王者則之亦先教而後刑三皇結繩五帝畫像三王肉刑五霸黜巧此言步驟稍有優劣也

傅子曰庖犧神農順民之性育之者也黃帝除民之害救之者也舜治天下垂拱無為者以咎繇既舉而不仁遠也禹治洪水冠挂不顧者不以下憂累其上也湯去三面之網歸之者四十國文王葬城隅之枯骨天下懷其仁所惠者小所感者大仁心先之也

又曰不使不仁加乎天下用武勝殘而百姓以濟此仁形於撥亂黃帝是也時有萬物必世而後仁此著於治平堯舜是也

周生烈子曰居堯舜之位而不行唐虞之政者猶反衣狐白步牽騾耳

黃石公三畧曰夫三皇無言化流四海故天下無所歸功帝者體天則地有言有令而天下太平君臣讓功四海行焉王者制人道德降心服志設短借長有察察之

政甲兵之事備而無爭戰血刃之功天下太平君無疑
於主國定主安臣以義退亦能美而無害

又曰任德者縱任義者橫縱成者王橫成者霸王兵法
天霸兵法地天者德不可量地者戚不可圖不量不圖
者萬物之父母也

袁子正論曰堯舜之人比屋可封非盡善也猶在防之
水非不流也桀紂之人比屋可誅非盡惡也猶在壑之
水非不停也

班彪王命論曰帝王之作必有明聖顯懿之德豐力厚利積累之業然後精誠通於神明流澤加於生民故能為鬼神所福饗天下所歸往未見運世無本功德不紀而能崛起在斯位者也

傅彥林王命敘曰帝王之起必有天下瑞應自然之符明統顯祚豐懿之業加以茂德成功賢智之助而後居世臨臣為神所保佑永世所尊崇未見運敘無紀次勲澤不加於民而可力爭覬覦神器者也

阮籍通老論曰三皇依道五帝仗德三王施仁五霸行義強國任智蓋優劣之異薄厚之降也

韓子曰明王制其臣下者二柄而已矣二柄者刑德也殺戮之謂刑慶賞之謂德也

崔寔政論曰自堯舜之帝湯武之王皆賴明哲之佐博物之臣故臯陶陳謨而唐虞以興伊箕作訓殷周以隆及繼體之君欲立中興之功者曷嘗不賴賢哲之謀乎鄧子曰堯置欲諫之鼓舜立誹謗之木湯有司直之人

武有戒慎之銘此四君者聖人也而由此之勤至於粟
陸段東里子宿沙君戮其父桀誅龍逢紂剗比干此四
君者亂君故其疾賢若仇是以賢愚之相較若百丈之
谿萬仞之山若九地之下與重天之顛

墨子曰古者民生未有刑政之時選擇天下之賢可者
立以為天子

又曰凡國之萬民皆尚同乎天子而不敢下比天子之
所是必亦是之天子之所非必亦非之去而不善言學

天子之善言去而不善行學天子之善行天子者固天下之仁人也舉天下萬民以法天子夫天下何說而不治哉

又曰古者聖王制為衣服之法曰冬服紆緇之衣輕且煖夏服絺綌之服輕且清則止諸加費不加於民利者聖王不為

又曰天子者天下之窮貴也天下之窮富也故富且貴者當天意而不可不順順天意者兼相愛交相利必得

賞反天意者別相惡交相賊必得罰

尸子曰人之欲見毛嫵西施美其面也夫黃帝堯舜湯武美者非其面也人所欲觀焉其行也所欲聞焉其言也而言之與行皆在詩書矣

又曰夫堯舜所起至治也湯武所起至亂也問其成功孰治則堯舜治問其孰難則湯武難

又曰孔子曰商汝知君子之為君子乎子夏曰魚失水則死水失魚猶為水也孔子曰商知之矣

又曰治天下有四術一曰忠愛二曰無私三曰用賢四曰度量通財則用足用賢則多功無私百知之宗也忠愛父母之行也

又曰堯舜禹脛不生毛文王至日昃不暇飲食故富有天下為天子矣

太平御覽卷七十七